


**Te tikanga mahi**

- 1 Tapatapahia ngā pēkana kia pakupaku ngā maramara. Pīhorea te riki, kātahi ka tapatapahi ai. Purua ki roto i te kōhua.



- 2 Uhia ki te paratiki angiangi. Taona ki roto i te umu tira mō te rima meneti, engari, ko te kaha o te tao kia rima tekau paiheneti o te umu tira.



- 3 Kīnakihia ki ngā rīwai, ki ngā kānga, ki te wai wera, ki te paura heihei hoki. Kōroriroria.



- 4 Uhia anō te kōhua ki te paratiki angiangi, ka tao ai ki te katoa o te kaha o te umu tira mō te tekau meneti.




- 5 Kaurorihia anō. Kīnakihia ki te heihei. Uhia anō te kōhua.



- 6 Taona anō mō te rima meneti ki taua wera anō, arā, te rima tekau paiheneti o te umu tira.



- 7 Tangohia te kōpani o te kōhua. Taona anō mō te rima meneti. Kia rima tekau paiheneti anō te kaha o te tao.



- 8 Ringihia te miraka me te pāhiri ki roto. Kōroriroria. Kainga.



## Te kū

Ko te tinana o tēnei taonga he pirita, he kareao rānei ki wētahi. Ka tīwhanatia te pirita, kātahi ka herea ngā pito e rua mā te au kia noho kōpere tonu ai te pirita. Mārō tonu te au hai katokato, hai raraku rānei, ā, hai pākuru rānei mā tētahi toko rākau. Ko tētahi pito o te kū ka noho ki roto i te waha. Mā te whakahāmama o te waha me te whakamārōrō i te au e tangi ai. Inā te rite o tōna reo ki tōna ingoa, kū, kū, kū, kukū. E ai ki te tohutohu koinei te taonga hai āwhina i ngā taura e ako pātere, tauparapara, haka rānei kia mau ai ki te hinengaro. He hoa anō hoki mō ngā karakia.



Kei te taha mauī e pākuruhia ana te pākuru e Richard Nunns, ā, kei tētahi taha e whakatangitangi ana a Hirini Melbourne i te kū.

## Te tumutumu

He taonga tēnei nō tua whakarere. He kōhatu, he kōiwi, he rākau rānei i kitea, ā, i tukitukia hei hoa mō te karakia, mō te takutaku atua.

## Te pākuru

E rua ngā toko poroiwi o tēneki taonga. Ko tētahi he toko nui he mea tiki atu i ngā rara o te upokohue. Ko tētahi he toko iti. Mā te mea iti e pākuru te mea nui kia puta ai te tangi. Ka maua tētahi pito o te toko nui ki roto i te ringa, ko tētahi pito ki roto i te waha. Ki te kōwhakiwhakihia te toko nui i te wā e pākuruhia ana ka pūwakawaka te rangi o tōna tangi.

## Te tōkere

Ko te tōkere he rite ki ngā whakapākōkō a ngā Pāniora. Ko ā te Māori he mea hanga mai i te rākau, i te poroiwi, i te kotakota rānei o te kuku, o te tupa, o te toheroa rānei. Ka honoa tētahi pito, ā, pupuri ai ki roto i ngā ringa, mā te kūwhera i te kōnui me te kōroa e hāmama ai te tōkere ānō he ngutu rakiraki.